

# المقابلات الشخصية

439

للمسار الصحي والتمريض

" طريق الألف ميل يبدأ بخطوة "

FROM 438



بدايةً نبارك لكم ترشيحكم للمقابلة الشخصية  
في **جامعة الملك سعود** للمسار الصحي أو التمريض  
وهذا بحد ذاته شرف عظيم لكم وللجامعة نفسها انها  
قبلت كوادر طلابية مثلكم 🥰❤️ .

انتوا حالياً مقبولين بنسبة 99% في المسار الصحي أو  
التمريض

ال 1% هاذي هي إجراء روتيني من ادارة الجامعة  
للمقبلين على التخصصات الصحية لهدفين :

يتأكدون ان الطالب يرغب في هذا المجال ، ان الطالب  
قادر ومستعد للدراسة والعمل في هذا المجال

# المقابلة الشخصية لطالبات المسار الصحي والتمريض

•مكان المقابلة:

جامعة الملك سعود بالدرعية

•مدة المقابلة :

راح تكون مدتها من 10-15 دقيقة باللغة العربية

•كيفية المقابلة :

يمكن تقسم المقابلة لقسمين:-

الاول : راح يعطوك ورقة تعبي فيها بياناتك الشخصية وترتب فيها

رغباتك , وايضاً راح يكون فيها بعض الاسئلة العامة

الثاني : راح تتناقشين مع 3 دكتورات ( دكتورة راح توجه لك الاسئلة

وتحاول تنتقدك , والثانية راح توجه لك الاسئلة العامة , اما الثالثة تكون

دارسة علم نفس وتحلل تصرفاتك وحركاتك)

✨ اهم النصائح للمقابلة الشخصية :



• هيئي نفسك للمقابلة ، لا تتوترين يكفي إنك تطلعين على الأسئلة اللي جت الدفع السابقة وتجاربهم وتدربين نفسك عليها ، ولكن مو شرط تجيك نفس الأسئلة لكن حلو إنك تاخذين فكرة 🤔❤❤

• يُفضل إنك تروحين بدري للمقابلة عشان تهيين وتريحين نفسك وتاخذين على الوضع ✅ ويمكن برضو يدخلونك بدري قبل وقتك ❤❤

• ألبسي لبس مرتب وبسيط (بلوزة وتنورة) لأن بعض لجان المقابلة يطلون تفسخين العباية ف إختاري لبس يعطي عنك إنطباع جيد ❤❤

• حاولي وقت المقابلة ماتتورين أو تبينين توترك ببعض التصرفات مثل؛ هز الرجلين أو اليدين ، طقطقة الأصابع، تلعبين بشعرك تشتتين النظر او تناظرين لتحت وما إلى ذلك.. بالعكس ارتاحي واجلسي الجلسة الصحيحة ❤

• خليك مرتاحة على الآخر ( تذكري انك اساسا مقبولة باذن الله تعالى انما المقابلة هي فقط وسيلة مباشرة عشان يتعرفون عليك اكثر واكثر واي تخبيص لا سمح الله لك في المقابلة ماراح ينحسب ضدك او يضرك بشي لانك انقبلتي أصلاً )

• خليك واثقة من نفسك، لو فيه شيء ماتعرفين جوابه قولي ما أعرف ،ماعندي خلفية زي كذا أبداً لا تتفلسفين وتفتحين لك باب إنتي في غنا عنه 😬 لأن ممكن يسترسلون بالأسئلة بالموضوع هذا وتتوهقين ..



•خلي أجوبتك واضحة وسطحيه وعلى قد السؤال لا تتعمقين ولا تتفلسفين عشان

برضو مايترتب على الموضوع سؤال ثاني وثالث

•خليك صريحة بأجوبتك لا تكذبين (حتى الورق اللي يعطونكم قبل المقابله الشخصيه

جاوبيه عليه بمصداقيه لأن يمكن مقابلتك كلها تكون حول أجوبتك بهالورقه) ،عاد

بعض الأشياء تتطلب الكذب الصغيره البيضاء 😂😂

•لا تبينين أن عندك مره خلفيه عن الموضوع هذا والمعرفه الواسعه وتتفلسفين لأن يمكن

يتعمقون معك بالأسئله (إلا إذا كنتي فعلاً عندك خلفية واسعة عن هالموضوع بالعكس

تكلمي يمكن هالشيء يفيدك ويخلي كل المقابله تتمحور حول هالموضوع 🥰❤)

•جاوبي على السؤال بعقلانية ،إنتبهي تتصنعين المثاليه والأجوبه المثاليه اللي بزياده

😊، عادي خليك زي ما إنتي على طبيعتك ❤❤

•والأهم من ذلك ناموا زين زين قبل المقابله وأصحو من بدري وأفطرو وروقو وهدو

نفسكم ❤✅

-وأكيد كل شيء بيد الله أدعوه كثير وتوكلو عليه المقابله جداً بسيطه ودام تم ترشيحك

ف نسبة قبولك جداً كبيره بإذن الله ❤❤❤❤

بالعادة مافي احد ينرفض او يفشل في مقابلة الكليات الصحية الا في حالتين :  
اذا ما حضرت الطالبة للمقابلة - اذا اخفقت في ايضاح الهدفين الاساسيين من المقابلة الشخصية  
للكليات الصحية والتي هي :-

## رغبة المتقدم في المجال الصحي

بهذا الجانب يحاولون يعرفون اذا انتي داخلة المجال عن رغبتك وميولك او اجبار ورغبة من اهلك  
واللي حولك وانتي غير مهتمه لهذا المجال مو شرط يكون السؤال صريح ممكن من خلال الاسئلة  
يتطرقون ان اهلك يجبرونك تسوين كذا او تشتركين في هذا التطوع او هذا المجال " فكل اللي  
عليك توضحين هنا ان المجال الصحي هو رغبتك وميولك "

## قدرة المتقدم واستعداده للدراسه والعمل في المجال الصحي

وهذا الجانب هو الاهم واللي مفروض تركزون عليه لما نقول قدرته للعمل في هذا المجال يعني يلاحظون اذا انتي  
ملائمة للمجال الصحي من عدة جوانب خلال ما هم يسألونك : يلاحظون اذا انتي تمتلكين العصبية الزائدة مثلا  
وهذا غلط جداً كون انك داخله على مجال صحي مفروض تتخلصين من هالصفة يحاولون يسألونك اذا احد سبك  
او غلط عليك وموقفك وغيرها من الاسئلة مثل كذا اللي يحاولون يعرفون اذا انتي تعصبين او لا وكيف وقتها  
تتعاملين برحابة صدر برضوا بيعرفون اذا تقدرين تتحملين الضغط النفسي او لا بيشوفون اذا عندك صفة الخوف  
والارتباك وغلط مرة تبينين انك تخافين من الابر وما تقدرين تتحملين



✳ بعض الاسئلة التي تتكرر في المقابلات :





يُفضل تاخذين نظره عامة وتتطلعين على هاذي الاسئلة, وفي اثناء القراءه حاولي يكون عندك مبادئ وافكار ممكن تقولينها اثناء مقابلتك بس انتبهني انك تحفظين الاجوبة طبعاً. مثل ليش ارغب بهذا التخصص؟ ايش الايجابيات اللي املكها وتفيدني بتخصصي المستقبلي؟ الخ والسؤال الأول ح مقابلة تكلمي عن نفسك(اسمك -درجاتك ) فاحفظوا درجاتكم في القدرات والتحصيلي

- ماهي دوافعك للدخول الصحي ؟
- اهلك راضين انك تدخلين صحي ؟ وكيف ممكن تقنعينهم لو كانوا معارضين؟
- هل تؤيدين العمل الجماعي ؟ او تفضل العمل لوحدك ؟ ولماذا ؟
- اشياء بنفسك ترغبين تغييرينها ؟
- ماهي نقاط ضعفك وقوتك ؟
- ماهي الحلول لشخص في مجموعتك لا يبادر العمل وكسول ؟
- ما رأيك بعمل المرأه في القطاع الصحي ؟
- هل سبق وشاركت في بحوث أو فعاليات ؟ ماهي ؟
- لو مات المريض اللي كنت تعالجه, واهل المريض يلومونك ايش تسوي ؟
- ايش تسوين لو تحرش فيك شخص بمكان عملك ؟
- مره سألوا عن امير قطر الجديد وعن اذا تأيد ان يكون الحاكم صغير سن ام كبير؟
- ممكن يسألون عن مرض معين واعراضه واسبابه ؟ ممكن تجاوبين ب لا اعلم
- ماهي المبادرات اللي قمتي بها لتطوير مهاراتك الشخصية، الغويه،الثقافية ؟
- ماهي رسالتك وطموحك في تخصصك المستقبلي ؟
- هل تفضلين الدراسة في السعودية ام البعثه للخارج ؟ ولماذا ؟
- ما رأيك بالمحاضرات المتأخره لوقت العصر مثلاً
- ايش تسوين لو ما انقبتني بأول رغبة لك ؟
- عطيني مشكلة في المجتمع شاغلتك؟؟
- ايش تحبين تسوين بوقت فراغك ؟
- ما هي المشاكل و التحديات اللي تواجه الطبيبة ؟
- ايش يحتاج الطبيب عشان يكسب ثقة المريض ؟
- ما الذي يجعلك مؤهلاً لدراسة المسار الصحي وما الذي يميزك عن غيرك ؟

- ما هي اهم مشاكل المجتمع الصحية ؟
- كيف يمكنك المساهمة في نشر الوعي الصحي في مجتمعك؟
- ما هي سلبيات التخصصات الصحية؟
- ايش اكثر شي ينتقدونك فيه الناس؟وايش تسوي عندك تعرضك للنقد؟
- سبب اختيارك لجامعة الملك سعود؟
- المبادرات التي قدمتها لخدمة المجتمع؟
- برأيك اغلب العاملين في القطاع الصحي يفضلون العمل الجماعي ام الفردي ولماذا؟
- كيف تشوفين نفسك بعد دراستك للمجال اللي تبينه؟
- الصعوبات التي تواجه المجال الصحي دون غيره من المجالات؟
- تجربه سيئه وكيف تخطيتها؟
- التحديات الصحية والغذائية والاجتماعية التي تواجهه المملكة؟
- لكل مجال هدف ورساله فما رساله المجال الصحي؟
- لو اختلفتي انتي واخوك فوجهات النظر؟
- لو جاك مريض ومعصب وبييك تعالجينه على طول كيف بتتصرفين معاه؟
- اذا احد انتقدك وشلون بتتجاوبين معاه؟
- ليش اخترتي(....)رغبه ثانيه؟
- اذا شخصتي حالة وقال المشرف انه تشخيصك خطأ قدام المريض بيأثر فيك ؟
- وش الصفات الي تخلي الدكتور ناجح ؟
- وش سمعتي عن المقابلات ؟ وش قالوا لك البنات عنها ؟
- قد تطوعتي؟
- ظاهره منتشره بين البنات اللي بعمره؟
- تخيلي نفسك وزيره الشباب والاطفال ووش المشكله اللي تبين تحلينها؟
- كم عدد سنوات تخصص (اي تخصص من التخصصات الصحية) ؟
- من وجهة نظرك اي المهن الصحية اكثر اهمية وليش؟
- ايش الصفة اللي تتمنين تتصفين فيها؟
- لو وصفتي وصفه خطأ اثرت بالمريض ممكن ادت لفشل الكلى عنده وش موقفك؟
- كيف بتنظمين وقتك والعمل و العائله والاطفال عطينا مثال يعني ليومك كيف بيكون او خطه رسمتها ؟
- كم تتوقعين ساعات العمل و المناوبات هل عادي عندك مستعده للدوام الطويل و المناوبات؟؟
- وش الامراض المنتشره؟



- وش المشاكل بالمجتمع حالياً؟
- ايش هواياتك؟
- لو ما انقبلي عندنا ايش بتسوين؟
- كيف لغتك الانجليزية
- كيفك مع الحاسب؟
- وجهة نظر المجتمع للمجال الصحي
- الاختلاط هل ممكن يمنعك عن العمل
- اذا زوجك قالك اطلعي من هالمجال ايش بتسوين؟
- ايش يحتاج الطبيب عشان يكسب ثقة المرضى
- رأيك بمواقع التواصل الاجتماعي؟
- ايش تكتيبين بمواقع التواصل الاجتماعي؟
- اهم الاحداث السياسية اللي صايرة الحين
- تويدين اجتماع الصديقات ؟
- احد من اقاربك يشتغل في المجال الصحي ؟
- اذا صار بينك وبين دكتور نقاش حاد هل راح تتنازلين عن رأيك او لا؟
- اذا زوجك رفض شغلك بالمستشفى ايش بتسوين؟
- لو اصبحت ممارس صحي ايش ممكن تسوي خارج المستشفى؟
- وزير الصحة حالياً ؟
- اذا عندك عداوة مع شخص وجاء للطوارئ هل راح تعالجه؟ وليش؟
- ليش اخترتي المسار الصحي؟
- عطينا سبب يخلينا نقبلك؟
- لو توفى مريضك كيف ممكن توصلين لاهله الخبر؟
- لو مريض أخطأ بحقك وش بسوين؟
- لو شفتي دكتور يدخن قريب من المريض ,كيف بتصرفين ؟
- لو خلصتي دراسة وما حصلتني وظيفة وشبتسوين؟
- لو تأخرتي على عيادتك وشفتي المراجع معصب ويهاوش وش بتسوين؟
- وش انجزتي بالصيف هذا؟ او وش مقررة تنجزين؟
- 



- هل اهلك راضين ومشجعين لفكرة الصحي؟ او القرار لك لحالك؟
- وش التخصص اللي تبين وكم عدد سنواته
- وش كانت ردة فعلك في اول درجة قدرات وكانت عاجبتك اولاً؟
- وش روتينك للمذاكرة؟
- لو كنتي بغرفة العمليات وعندك حاله طارئه واللي حولك يستعجلونك يعني حولك حاله توتر .. وش بتسوين؟
- لو كان المريض ابوك وانتي بغرفة العمليات هل رح تسوين له العملية أو لا؟ وكيف
- ردة فعلك ممكن تكون وقتها
- ليش شكلك متوتره كذا؟ "او اي ملاحظة على شكلك"
- لو صرتي وزيرة الصحة وشبتسوين؟
- اذكري الصفات الحلوة والسيئة فيك.
- وش ونقطة ضعفك؟
- وش الموقف اللي حسسك انك قد المسؤليه وتعرفين تتعاملين مع الضغط؟؟
- وين تشوفين نفسك بعد ١٠ سنين؟
- تحبين تكتبين او تقرين؟
- لو تزوجتي و عندك عيال وعندك مناوبه وش بتسوين بعيالك؟
- في احد من صديقاتك قد صارحتك بشيء خطأ فيك؟ وكيف تعاملتي مع الوضع؟ زعلتي او لا؟
- كيف تنظمي وقتك؟
- المجال الصحي فيه فرص وظيفية نفس التسويق ليش مادخلتيه؟
- لو عندك اختبار بكره واختك الصغيره عندها اختبار ومحتاجتك مره تساعدونها كيف رح تتصرفين؟
- هل قد تعرضتي للظلم ووشلون تصرفتي؟
- وش التخصص اللي تبينه وكم عدد سنواته؟
- وش العيوب اللي فيك تشوفينها بتعيقك بالتخصص؟
- ليه اخترتي هذا التخصص؟
- وش رايك بالظلم؟
- تحسينك قد الثقه؟
- قد تحملتي مسؤوليه البيت كلها حالك؟

✨ بعض التجارب الشخصية:

## سارة الدوسري - تمرير

السلام عليكم ❤️

تجربتي مع المقابلة كانت جددا حلوه جدا سريعه  
طبعا المقابلة فيه قبلها ورقه تعيينها اسئله تجاوبين وكذا اشياء  
بسيطة ، جاوبي بصراحه وبدون ما تتعمقين يعني جاوبي على قد  
السؤال "طبعا بالورقه وبالمقابلة" .  
مقابلتي ابدا الاسئله اغلبها ما طلعت عن الورقه كنت احس انهم  
بس يطابقون اجاباتي اذا نفسها او لا ، وسألوني كم سؤال  
خارجي عن المستشفى ، اذا فيه طفل يبكي ميف بتتصرفين معه  
ومع امه وكذا ، السؤال اللي ماتعرفين اجابته عادي "ما اعرف" اهون  
من الفلسفه لان بعدها وهقه ، اذا تعرفين شي عن الموضوع قوليه ،  
وزعي النظر على المقابلين كلهم ، وكوني مرتاحه المقابلة قصيره ، لا  
تصعبين الموضوع وخليه شي حلو وسهل ، وبالتوفيق ❤️❤️❤️

## اريج نحاس - علاج علل النطق والسمع



معاكم أريج ((تخصص علاج علل نطق وسمع ))

بحكيكم تجربتي عن المقابلة الشخصية

وأتمنى تستفيدوا وقبل كل هادا خلاص اعتبروا نفسكم مقبولين بإذن الله يكفي ترشيحكم ووصولكم هنا للمقابلة، لانو نادر مرا اللي ما ينقلوا واتمنالكم التوفيق



طيب اول حاجة الموقع في بوابة القبول الموحد احضروا قبل الموعد بوقت كافي  
عشان تعبوا الاوراق وكدة ومو شرط تدخلوا عالموعد يا قبل او بعد عادي فحطوا  
هادا الشئ في بالكم مرا عادي

[المطلوب منكم اصل الشهادة الثانوية وأصل بطاقة الهوية بس]

طبعا ما اوصفلكم كمية الرعب كان متملكني انا من طبيعتي خوافة واخجل 😊



وقرأت تجارب بنات الدفعة اللي اكبر مننا وكنت اشوف الاسئلة واتدرب وأجاب  
عنها كدة كل يوم يمكن من قبلها بكم يوم وانا أقرأ وأقرأ خوف زالايد والله مالو  
داعي أبداً

منجد يعني كلالام عادي وسوالف مرا ما حتسوا بالوقت  
المهم استعدادت ليوم المقابلة وكنت لابسة كدة قميص بسيط مع تنورة وممكن روج  
خفيف وكدة افضل البسو تنورة عشان لو قالولكم شيلو العباية او شئ تعطوهم  
انطباع كويس خليك بسبطين قد ما اتقدروا

في شكلكم وكلامكم 😊

وحياتأكدوا المسؤولين من بياناتكم وقبل ما تدخلوا ياخذو جولاتكم وقبل ما تدخلوا  
المقابلة حيعطوكم ورقة تعبوا

فيها بيناتكم وتكتبوا رغباتكم بالترتيب وفيها اسئلة  
طبعا بنات حتى لو مو متأكدين دحين من رغباتكم عادي اهم شئ اللي تكتبوه  
بالورقة يكون نفس اللي تقولو بالمقابلة تأكدو من هادا الشئ مرا مهم لانو غالباً

يسألوكم عن الاسئلة اللي كانت بالورقة 🙌

وحيكون في متطوعات بنات منجد يجننوا ومرا خففولي التوتر وقتها اتذكر كانت  
طالبة طب قالتلي اشربي موية وتكلمت معايا وخففت من توتري وبس نادوني

سميت بالله ودعيت ودخلت 🚶

اهم شي ثقتم وتبينوا قد ايش انتوا حابين بالمسار الصحي هم يتأكدوا من هادا  
الشي وهل انتم مجبورين ولا لا



اول شي قالولي عرفينا عن نفسك

عادي قتلهم اسمي واني درست في المدرسة الفلانية  
وكم كان معدلي ودرجاتي في التحصيلي والقدرات  
بعدين تكلمت معايا عن رغبتني الاولى وليش اخترتها؟

قتلتها ان حلمي من صغري وانا حابة هادا التخصص واشوف تخصص جداً  
إنساني واشوف نفسي فيه بإذن الله ووالخ يعني ما اتذكر الصراحة بالظبط ايش  
جاوبت

وبعدين قالتلي كيف انجليزيتك قتلها لا بأس فيها بس بإذن الله بشتغل على نفسي  
وقاعدة اطور نفسي دحين في الاجازة

قالتلي الدراسة حتكون كلها انجليزي تحسي تقدر تتجاوزي هادا الشي؟ 🤔  
قتلتها ايوة بإذن الله لانو عندي حلم وطموح لو حط شي في راسو انو يسويه حيقدر  
ومافي شي يوقف قدامو قالتلي طيب ايش قاعدة تسوي في الاجازة كيف بتطوري  
من انجليزيتك دخلتي معاهد!؟

انا كنت وقتها في مكة فقتلتها لا في مكة مافي معاهد مرا كويسة فأنا بشتغل على  
نفسني بقراءة الكتب والفيديوهات  
وكدة قالتلي يعني جااية من مكة مخصوص عشان المقابلة قتلها إيوة اكيد هناا مرا



فرحت قلت خلاص اريج اكيد حيقبلوكي جااية من مكة وتعب 😊  
الصراحة نسيت ايش السؤال الثالث بس ما كثروا اسئلة معايا وما تفلسفت كثير  
عشان ما أطولها

بس بنات منجد اهم شي تكون واثقين من نفسكم



ومافي حاجة تخوف واتمالكوا اعصابكم وخليكم هادين ومبتسمين 😊  
وبس خلصت وقتلتهم شكرًا و مع السلامة وابتسمت

وانا طالعة عنيد الباب سمعت وحدة من ال٣تقول لذيذة البنت 😊 هنا ارتحت مرااا  
وبس حتعدي بشكل جداً سريع وطبيعي الكل كان خايف وقلقان بس حقيقي من  
اجمل التجارب في حياتي واجمل يوم

وحتشوفو بس تخلصوا انكم عطيتها اكبر من حجمها

خليكم جاهزين للاسئلة وداخلين وانتم واثقين بنفسكم

ومبتسمين وبينولهم رغبتكم الشديدة بالصحي وانكم مو مجبورين



وبإذن الله مقبولين كلكم

الله يكتبلكم كل الخير والتوفيق يارب





# رنا العقيل - علاج طبيعي

هلا هلا فيكم

تجربتي مع المقابلة الشخصية كانت استثنائية لاني سويتها مرتين مره في جامعه الاميره نوره ثم بعدها طلعت ورحت لجامعه الملك سعود ❤️ واجريت المقابلة فيها للمره الثانيه ✨

كانت المقابلة بشكل عام خفيفه ولطيفه 💕 وشي جميل جدا لما تتقابلين مع منسوبين من الجامعه وتتكلمي معهم 🙌 ممكن تكونون متخوفين منها شوي بس صدقوني بعدين بتضحكون وتقولون كيف خفنا منها كذا 😂😂

في البدايه اول ما دخلت طلبوا مني بطاقه الاحوال وخذوا جوالي مني 📱 وحطوه في ظرف وعطوني رقم للظرف اخليه معي (حافظوا عليه لان فيه بنات وقتها ضاع منهم من اللخمه)

بعدها جلسونا في كلاس كبير وعطونا ورقه نجاوب فيها عن الاسئله 📝 مثلا اسمك الرباعي رقم الهويه

وايضا اسئله عن المسار الصحي 🧑🏻 مثل ايش اخترتيه وهل اذا ما انقلمت ايش راح تسوين وهذا وغالبيتها اتوقع خيارات يعني يسئلونك وفيه ٤ خيارات اختاري منها ✓

بعدها اخذوا الاوراق وبدوا ينادوا بالاسماء عشان تدخلين المقابله والليدر الي موجوده عليكم راح توجهكم وين تروحون بالضبط 🙌 وفي اي غرفه راح تسون المقابله ❤️❤️

اول شي لما جيت ادخل طقيت الباب وقلت السلام عليكم صباح الخير ✨ ممكن اتفضل وقالوا طبعاً وجلست بتكون غالباً فيه ٣ دكاتره وحده في الوسط وغالبية الاسئله هي الي راح تطرحها

وفيه دكتوراه على اليمين راح تكون مبتسمه طول الوقت وممكن تسئل بعض الاسئله 💡 والثالثه راح تكون جديه ومافي اي تعابير على وجهه وغالباً ممكن تحجر لك لكن انتي خلي الوضع ايزي وعادي 🧡

سألوني عدة اسئلة مثل/

ليش اخترتي المسار الصحي؟

جاوبي كان/ المسار الصحي فيه تخصصات كثيره انسانيه وتخدم الانسان والمجتمع وجانب خدمه والعطاء كان احدي الجوانب الظاهره في شخصيتي والي الحظه دائما فيني من ايام الثانوي

هل فيه احد غاصبك تدخلين المسار الصحي؟

جاوبي كان/ لا ابدأ انا وصلت لمرحله احس اني قادره اميز فيه طريقي ومستقبلي وهذا شي مهم جدا بالنسبه لي فأبدأ ومستحيل اسمح لاحد ان يوجهني بدلا عني

وش التخصص الي ودك تتخصصينه بعد التحضيري؟

انا كان حلمي ادخل العلاج الطبيعي والحمد لله تخصصت بهذا الشئ بفضل من الله ومنته

وجاوبي كان/ انا بأذن الله راح اتخصص بتخصص العلاج الطبيعي

ليش اخترتي هذا التخصص ولو ما انقلتي فيه وش راح تسوي؟

جاوبي كان/ تحدثت مسبقا ان فيني جانب كثير انساني وجميع التخصصات الصحيه اكيد انسانيه وقريبه جدا من العطاء والدعم والمساعده ولكن تخصص العلاج اقربهم لهذه الصفات بسبب اني اكون قريبه جدا من المريض كون ان احيانا المريض يتطلب خطه علاجيه طويله قد تدوم اشهر فالوقت الي راح اقضيه مع المريض اكيد راح يكون شي يسعدني

ولو ما انقلتي فيه لقدر الله فا انا اولاً واخيراً راح ابذل قصار جهدي عشان اوصل لحلمي وراح اكون قادره بأذن الله اني اصل له وفي الاول والاخر كله بيد الله

وش خلفيتك عن التوعيه ضد امراض العصر؟





هنا انلخمت شوي لان كان شوي السؤال جديد علي ولكن جوابه كان سهل










مثلاً

امراض العصر هي الامراض الي تكون غالبا منتشره بمجتمعنا مثل داء السكري - ارتفاع ضغط الدم - السمنه وغيره وكلها نقدر نوعي اصحابها بممارسه الرياضه واتباع نظام غذائي سليم وصحي

لو ما انقبلتي بجامعتنا وش راح تسوين؟

جوابي كان/ انا راح ابذل قصار جهدي عشان ادخل هذي الجامعه وان حصل  
لقدر الله فسأحاول مره ثانيه وابعول بعد الترم الثاني ولو ما انقبلت ابحاول قدر  
الامكان وابعول واذا خلاص ما انقبلت بعد محاولات كثيره ابرضى بالي كاتبه ربي  
لي بس بنفس الجامعه هنا في جامعه الملك سعود

وبس بعدها قالوا يعطيك العافيه الله يستر عليك  وبعدها طلعت والحمد لله وانا  
راضيه عن اداء المقابله وبديت استغفر وادعي  بعد ما طلعت اني انقبل  
واخيرا فيه بعض الاشياء الي يفضل انكم ما تسونها   مثل  
الجلسه رجل على رجل- والعلك بصوت عالي- والتكشير

  وادخلي مبتسمه وبشوشه ومتفائله لان المقابله ابدأ موب شي تعجيزي ولا  
شي صعب علينا دام اننا انقبلنا في الجامعه وهي اجراء روتيني عشان يشوفون  
انتي مغصوبه من اهلك  او انتي مو حابه الصحي وداخلته بس كذا   
وييون يعرفون رغبتك الشديده فيه وانك مختارته فعلا عن قناعه بس   
ربي يوفقكم يارب وان شاء الله نشوفكم منقبلين جميع وتبشرونا بأذن الله     
للاستفسارات انا حاضره هنا 

رنا العقيل  - علاج طبيعي

تويتر/ @rno123321

الاسك/ [https://ask.fm/ranamohmdmohamd?](https://ask.fm/ranamohmdmohamd?utm_source=copy_link&utm_medium=iOS&shareBy=ranamohmdmohamd)

[utm\\_source=copy\\_link&utm\\_medium=iOS&shareBy=ranamohmdmohamd](https://ask.fm/ranamohmdmohamd?utm_source=copy_link&utm_medium=iOS&shareBy=ranamohmdmohamd)



## ميعاد العضياني - تمرير

السلام عليكم

بتكلم عن تجربتي بالمقابلة اولاً قبل ماتدخلو عند اللجنة تبع المقابلة راح يكون في ورقه مكتوب فيها اسئله تجاوبوا عليها لازم تتكدون ان الاجوبه اللي تكتبونها ممكن يرجعون يسألونكم عن الاجوبه اللي كتبتها اول مادخلت للمقابلة كان في ثلاث دكتورات ثنتين يسألون ووحده يكون معها ورقه تكتب وتناظر ك فقط اول شي سألوني اسمي وهواياتي بعدين سألوني عن الامراض المنتشره

بعدين سألوني عن السكر والسمنه هنا استقعدولي شوي 😅 لان قالوا هالمجتمع واعى بالسكر والسمنه؟ طبعاً اختكم فالله قالت لا وصار يطلع من كل جواب اجاوبه سؤال لين ربي فرجها وغيره

بعدين سألوني عن الزواج وهل زوجي راح يكون راضي عن شغلي ودوامي وكيف راح اوازن بين شغلي ودوامي

واكثر شي شفع لي كنت ابتسم لان لما اتوتر ابتسم بشكل يوصل للضحك 😂😭 وحده منهم قالت لي شي طمني وقتها قالت انت مستقبلاً لما المريض يشوف ابتسامتك راح يشفى



## ذكرى الفهد - علاج علل النطق والسمع

السلام عليكم معكم (ذكرى الفهد طالبة علل نطق وسمع في جامعة الملك سعود) ❤️❤️ .

ببدأ بسم الله أقولكم تجربتي في المقابلة طبعاً قبل كل شيء لازم تكونون نايمين كويس ومستعدين بحيث أنكم قارين أسئله ومدربين نفسكم عشان تتجنبون التوتر



المقابلة بالنسبة لي تعتبر من أفضل التجارب اللي صارت لي صراحة يعني كانت تجربه جديدة وشعور حلو 😊❤️❤️ .

أول شيء دخلونا المبنى اللي راح نسوي فيه المقابلة اللي هو مبنى كلية الطب بالدرعية بعدين جلسونا بقاعة وبعدها بدوا ينادون بالاوقات اللي حاطينها لنا بالموقع بعدها دخلونا غرفة وعطونا اوراق نعبئها فيها أسئله هذي الاسئله مهمه مره لازم تجاوبون فيها بصدق لأن راح يسألونكم من خلالها اللي راح يقابلونكم بعدها بدوا ينادون بالاسماء ودخلونا طبعاً مفروض اول ماتدخلون تسلمون وتستأذنون عشان تجلسون لكن انا الله يسلمني سلمت وجلست على طول بعدها سويت ان محد قدي واني واثقه مانب متوتره ابد

طبعاً اللي راح يقابلونكم بيكونون ثلاث وحده تسجل وحده تسأل والثالثة تعطيك نظرات تنهي حياتك

المهم سويت نفسي عادي واني مختمه المقابلات بدت تسألني تقول أول شيء ليش اخترتي جامعة الملك سعود بالذات ؟

قلت عشانها جامعة عريقة وتعتبر الأفضل في التعليم حالياً ولجودة وكفاءة طاقم الاداره والتدريس بعدها عطتني ابتسامه حسيت اني ختمت الأجوبة جت ثانيه سألتني عن ترتيب رغباتي اللي كتبتها بالورقة وسألتني وش سبب أختياري لتخصص علل نطق وسمع بالذات قلت بداية ولد خالي صغير بالعمر تعرض لحادث وصار عنده مشاكل بالسمع والنطق وجاني فضول عن حالته ويحثت حببت التخصص مره وأكتشفت انه تخصص جديد ونادر يكون احد فيه بعدها رحنا رحلة من المدرسة لمكان يجمع التخصصات ويعرفنا عليها ف وافق ذاك اليوم كان موجود ناس من هالتخصص وحببته اكثر واكثر وان شاء الله اكمل فيه وابدع ،



بعدها قاموا يلتفتون على بعض حسيت اني خلاص مقبولة

لين جت اللحظة اللي هدمت تفاؤلي ، سألتني وحده منهم سؤال قالت لو ضاع لك شيء شتسوين قلت بقرأ دعاء الضالة المهم انفجروا ضحك علي حسيت اني سبيكة بعدها قالت لا يعني تشكين باللي حولك ؟ بعدها استوعبت انها بتقيس هل انا اثق باللي حولي والا لا وقعدت ارقع قلت لا ابداء انا حتى ارمي اغراضي محد يجيها لانني واثقه فيهم المهم هنا حسيت اني جبت العيد .....

بعدها جت عطتني اخر سؤال التحلية 🦴 ، قالت لو كنتي تمشين بالشارع وجاء احد فجئه سبك وش بتسوين ؟ قلت من دون سبب يعني ؟ قالت ايه ، قلت بسبه بعد خير ان شاء الله المهم هي ماتت من الضحك وانا قعدت الطم قلت راح عليك القبول ياذكرى طبعاً مفروض ما اجاوب كذا خطأ علي ، كنت ممكن اروح بدها بس الحمد لله تداركت الوضع وقلت بسأله وش السبب اللي خلاه يسبني وبحاول اخذ واعطي معه 😊 ، جو سلموا علي وودعوني وطلعت المهم صيحت عند اهلي اني ماراح انقبل بس الحمد لله انقبلت وكلشي تمام 😂❤️

اللي ابغى اقله اهم شيء تخلصوا من التوتر وحاولوا تتدربون وتقرن تجارب اكثر عشان تستفيدون وتتخلصون من توتركم واللي يقابلون تراهم حليات وحببيات بس لا تتهاونون حاولوا تجاوبون اجابات نموذجيه عشان يحبونكم وخليكم مرتاحين مره ، حاولوا ماتلفون ولا تدورون بالاجوبه وابتعدوا عن الاجوبه اللي تفتح عليكم اسئله وبس والله اتمنى اني افدتكم ❤️❤️❤️❤️

هذا التويتر حقي إذا عندكم أي استفسار :  
i\_thikraaf@

# لينا العصيمي - طب وجراحة

السلام عليكم

اسمي لينا العصيمي متخصصة طب و جراحة سنة أولى راح اتكلم لكم عن المقابلة و كيف انها اجراء بسيط و روتيني للتحقق من رغبتكم لا اكثر و لا اقل . بمعنى ان الجامعة تبي تتأكد انك فعلاً تبين هذا المجال بكل ما فيه من عوائق و نجاحات أيضاً . ✨

و المقابلة عبارة عن سواليف 😊 اهم شيء تكونين واثقة من نفسك و تعبرين بطريقة ذكية .

تجربتي مع المقابلة كانت جداً بسيطة رغم التوتر جاني الترشيح في اول يوم و كان يوم الأحد الساعة ٨ صباحاً طبعاً رحلت للجامعة ابكر و كنت نايمه زين قبلها بيوم و أفطرت و روقت بعدين رحلت ✓ و هذا من اهم الأشياء لا تروحين ابداً و انت سهرانه .

أول ما دخلت مع والدتي قالوا لها تجلس في الصالة الخارجية و بس انا المسموح اني ادخل للجامعة ، دخلت و رحلت لكلية الطب ( ثاني كلية على اليمين ) لان فيها موقع المقابلة

اول ما دخلت وجهوني و دخلوني على مدرج كبير ننتظر فيه 🙄🙄 يوم امتلاء المدرج شوي نادونا ندخل مرينا على اكثر من محطة يتأكدون من الهوية و يستلمون جوالك بعدين يدخلونك غرفة و يعطونك ورقة تعبين فيها بياناتك الخاصة و من الخلف اسئلة معينة عشان يسألونك عنها اللجنة بناءً على أجوبتك .  
مثل :

-هل تطوعي قبل كذا؟

- في احد من أقاربك داخل المجال ؟

- رتبي الكليات الصحية ( الترتيب فقط مبدئي و يسألونك عنه و ما له علاقة بالتخصيص )

بعد كذا تسلمين الورقة و تستنين دورك

لما تجي متطوعة اكبر منكم تناديك معها ملف عليه اسمك و الورقة اللي جاوبتي عليها ، تأخذك الى اللجنة و تدخل ورقتك قبلك عشان يقرؤونها . بعدين تدخلين .

و لما دخلت انا كنت متوترة مره 🙄 و الموضوع ما كان يستاهل بالبداية ابتسموا لي و رحبوا فيني و جلست على الكرسي و طلبوا مني اكتب بياناتي بعد ما كتبتها طلبوا مني اتكلم عن نفسي و لما بديت اتكلم بدا التوتر يختفي تدريجاً ✓ الى ان

نسيت اني بمقابلة و قعدت أسولف بكل أريحية 😊😊

طبعاً من اهم الأشياء انك تجاوبين بذكاء على الأسئلة مثل ما سألوني كذا :

- ✨ ايش هواياتك ؟

- أحب القراءة و احب اطور اللغة الانجليزية

- ✨ كيف تطورين من اللغة؟

- اتابع مقاطع في اليوتيوب بدون ترجمة او اتابع برامج معينة مشهورة استمتع

فيها و اطور من لغتي بنفس الوقت ! ✓

- ✨ طيب لو ما دخلتي التخصص اللي تبينه وش بتسوين؟

- طبعاً انا بشد حيلي و بسوي اللي علي و بتوكل على الله سبحانه و تعالى و

بالاخير وين ما يحطني ربي بكون واثقة انه المكان الصحيح و المناسب لي لان

ربي اعلم مني .

- ✨ طيب كيف توفقين بين عملك و عائلتك ؟

- الانسان الناجح يقدر يوفق بين أشياء عديدة و منها هالامرین بالطريقة الصحيحة

و تنظيم الوقت و ان شاء الله انا قدها .

بعد ما انتهيت ودعوني و كانوا مبتسمين و هالشئ اعطاني طاقة إيجابية و تفاؤل

انهم قبلوني 😊

كانت الأسئلة جداً بسيطة و زي ما قلت لازم تجاوبين بذكاء ✨ و تبينين لهم انك متمسكة بالمجال الصحي و ان محد أرغمك عليه او انك دخلتي بسبب درجاتك فقط.



## سارة البيز - طب أسنان

السلام عليكم انا ساره البيز تخصص طب اسنان وراح احكي لكم تجربتي في  
المقابله ✨

المقابله كانت حلوه ولطيفه 🍷

اول شي طقيت الباب و دخلت سلمت و صبحت عليهم بيكونون فيه ثلاث الي  
يقابلونك يطلبون منك توقعين على ورقه و قبل ادخل اجبروني اشيل العبايه

فنصيحه البسي لبس مرتب و رسمي لان فيه بنات لابسين بجامه 😓  
تقريباً سألوني عن الاشياء الي جاوبت عليها بالورقه انا من من الرياض انا من  
احد المحافظات التابعه لها 🏃 فسألوني يعني وين راح اسكن وكذا وسألوني اذا  
انا اول وحده في العائله تدخل مجال صحي والا لا واذا اهلي مشجعيني وكذا  
نصيحه مهما كان السؤال لاتكذبين ابدأ يعني انا مثلاً سألتني وحده اذا قد  
سويت عمل تطوعي او لا وانا ما عمري سويت فقلت لها لا والله بس اتمنى اني  
اشترك 🙋 ممكن لو قلت اني اشتركت تسألني وين واذا اعطوني شهاده او لا  
واتورط واطلع عندهم كذابه فعشان كذا لاتكذبون ابدأ 😄

طبعاً جاني السؤال المشهور ايش المشكلات الي تواجه المجال الصحي وعددتها  
لهم و يوم قلت الزواج قالت وحده بس الحين الرجال يدورون دكتورات وكذا حاولوا  
تقولون رد كويس طبعاً انا جبت العيد وقلت اييه عشان الفلوس(مع نبره تشره  
شوي) وحسيت بالغباء حق الاجابه وقلت الله يستر بس الحمدلله يوم ضحكوا  
ارتحت 🏃 😄

و قالت لو ما انقبت صحي ايش اسوي هنا لازم تبينين لهم انك فعلاً تبين  
الصحي مو على طول تستلمين يعني مثلاً تقدرين تقولين:  
ادخل اي مسار ثاني و اجيب معدل و احول او اقدم السنه الجايه وكذا يعني .  
وبالنهايه الله يوفقكم و يسهل عليكم ولا تتوترون بتكون لكم ذكرى حلوه صدقوني



# نورة العريفي - طب أسنان

اول شيء ابارك لكم وصولكم لها المرحلة الي تعتبر اخر شيء بالتسجيل واول خطوة لكم كطالبات جامعة الملك سعود للمسار الصحي .💕💕💕

بتكلم لكم عن المقابلة وكيف كانت مقابلي مقابلتي مقابلتي حرفياً كانت عسل مررره حلوه وخفيفة كنت متوتره قبلها لكن مرت، الي سووا لي المقابلة كانوا رائعين بشوشين واسئلتهم حلوه ما حجروا ابد ولا قالوا شيء غريب ومرت بسررعه .

تبدأ الرحلة اول شيء بعد ما يطلع الترشيح للمقابلات بتلاقين اليوم الي فيه مقابلك مع الوقت، نامي زين قبل وحاولي ماتتوترين كلها سوا ليف وانتي راجعه خليك واثقه من نفسك والبسي تنورة احتياط لو قالوا شيلي عبايتك اعطيهم طابع حلو بشكك البسي تيشيرت ابيض سادة او شيء يخلي شكك رسمي وجاد لو عندك شهادات تطوع واشياء حلوه خوذيتها معك في حال انهم قالوا عن التطوع شيء.. حاولي تطلعين بدري عشان لو صار الطريق زحمة او شيء ماتتوترين



الحين وصلتني عند باب الجامعة بتلاقين ناس يوجهونك للمكان في غرفة انتظار اذا جايه بدري وبعدها تعطينهم اثباتك وبعدين ياخذون اجهزتك وتدخلين على غرفة تعبين فيها ورقة هاذي اهم شيء بمقابلك! فيها عدد من الاسئلة هم الي بيستلونك عنها جاوبي بصدق وبنفس الوقت بالاجابة الي هم بيون يسمعونها وريهم انك صدق تبين هالتخصص وخليك هاديه بعدها بتدخليم الغرفة وبتلاقين ٣ جالسين طبية اسنان وطب بشري وطب نفسي الي بتكون تطالع فيك ولا تسأل لا تحطين رجل على رجل حاولي زي ما قلت تكونين رسمية مرره ومبتسمة اهم شيء بيعيدون الاسئلة وكل رد تقولينه يقول لك طيب ليش وعادي مره تقولين ما ادري بس لا تبدأين موضوع ما يتقفل وبعدين يصير الموضوع ما يتسيطر عليه.. هذا كل شيء بس خليك مرنه وايجابية ومبتسمة وبتمر عليك حلوه 😊 بالنسبة للاسئلة بيكون في فورمات تدربوا عليها

كويس واستعدوا قبلها وتذكروا انها دقائق وبتطلعون مبسوطين 🌱.


★ نقطة اخيره مهمة احفظوا نسب القدرات والتحصيلي والثانوي والموزونة سألوني عنها وجاوبتهم بسرعة وثقة كنت حافظتهم صم من كثر مارددتهم ذيك الفترة وحسيت انه اعطاهم انطباع جيد


وبالتوفيق يا حلويين ☁️


## نوف - طب وجراحة

السلام عليكم جميعاً، مبرووووووك ترشيكم للمسار الصحي ويارب تكتمل فرحتكم ويكتب لكم ربّ اللي فيه الخير   
بحاول ما أطول عليكم.. في البداية حتى ترتاحون المقابلة جداً جداً بسيطة وهدفها يعرفون مدى رغبتكم بالمجال الصحي وقدرتكم على الدراسة والعمل فيه . بتكون تجربة جميلة فتعالوا وأنتم مروقين 

هذي بعض الأشياء البسيطة اللي حبيت أنبهكم لها :

- ١- جهزوا كل الأوراق المطلوبة بدري
- ٢- افطروا فطور زين " كان مفروض موعد المقابلة نص ساعة لكن ماخلصت الا بعد ثلاث ساعات "
- ٣- التكييف في مباني الجامعة بارد فحاولوا تاخذون معكم شيء يدفي
- ٤- لاتنسوا الاذكار
- ٥- لاتكثروا شرب الماء : 

وهذي بعض أسئلتهم اللي توهقت شوي فيها، وأغلبها كانت مبنية على إجاباتي في ورقة الأسئلة فاخترتوا إجاباتكم بعناية :  
١- ليه طب الأسنان مو من ضمن ٤ تخصصات اللي تبين تدخلينها ؟  
من كثر ماكنت متفاجئة من السؤال جاوبت بسرعة وتورطت فيه... أتوقع كان مفروض أقول إن ما عندي ميول له وهذي التخصصات حبيتها أكثر . في الأخيبر طلع السؤال اللي في الورقة يطلب ترتيب الكليات عشان كذا استغربوا 

٢- ليه كل طرق تطوير اللغة عندك تعليم ذاتي، صح ماتحبين تجتمعين مع الناس وتدخلين دورات ؟  
كنت بقول ايه، وبعدها أذكر إيجابيات التطبيقات والكتب.. بس تذكرت إنهم ممكن يعتبرونها صفة سلبية :)  
فقلت (مو كل دورات تعليم اللغة تفيد رغم مشوارها وتكاليفها + أقدر أتعلم وأتكلم مع الناس في أي وقت باستخدام التطبيقات، حتى التعلم فيها يكون أمتع وأفضل وكل فترة يطلع تطبيق أزين من اللي قبله ✨) > أخذت راحتي بالفلسفة 

٣- إذا كان فيه مريض ويحتاج عملية، لكن شخص واحد من الطاقم رفض راي

٣- إذا كان فيه مريض ويحتاج عملية، لكن شخص واحد من الطاقم رفض راي البقية إيش بتسوين؟

أتوقع فيه إجابات أحسن من إجابتي بس اللي فكرت فيه ذاك الوقت ( أكيد بنشوف إيش بيقول، يمكن فيه خطأ ما انتبهنا له أو عنده حل أحسن ) ردت علي طيب الحالة مهمه جداً بتوقفين عشانه ؟ هنا توترت شوي بس كملت ( وعشان الحالة مهمه لازم نتأكد من كل شيء قبل، حتى مانندم بعدين )

**وأخيراً الأسئلة الشائعة مثل :** أصعب شيء ممكن تواجهه الطبية وكيف بتتصرفين معه، كيف بتتعاملين مع الدم، إيش الصفة اللي تتمنينها تكون عندك، طريقتك في تنظيم الوقت، إيش تسوين في وقت فراغك، تفضلين العمل الجماعي أو الفردي ...

**بالمختصر :** ثلاث أرباع الأسئلة بتكون عن أجوبتكم في الورقة، يعني إذا كنتوا مجاوبين عليها زين بتصيرون جاهزين لأسئلتهم وقت للمقابلة، والباقي مواقف أو مشاكل ممكن تواجهك وكيف بتتصرفين معها .

تقريباً مدة المقابلة 5د من كثر ماهي سريعة شكيت في أنهم بيقبلوني 😊، فلا تخافون أبداً إذا خلصتوا لأنكم سويتوا اللي عليكم بس باقي تدعون أن الله يرزقكم باللي تتمنونه ويجعل فيه الخير .

\*هذا الاسك المشترك إذا عندكم أي سؤال KSU439 ، وبالتوفيق لكم 🌟

# فاطمة حكيمي

أهلاً وسهلاً ❤️❤️ ...

راح أحكيلكم عن تجربتي بالمقابلة وأتمنى تفيدكم ❤️.

أول شيء وأهم شيء لا تفكرين أبداً تروحين سهرانه ✅ نامي كويس وأرتاحي والصبح قومي وأفطري وألبسي لبس مرتب يليق بكونك طالبة ❤️😄.  
وأبداً لا تشيلين هم من كونك متوتره هذا الشيء جداً طبيعي وكلنا مرينا فيه، بالعكس حاولي قد ماتقدين تهدين من نفسك وتثقين فيها ❤️.

بالبداية "قبل المقابلة" بـ يدخلونك بغرفه حاسب كذا مع ورقة فيها أسئلة وبيانات تعبينها قبل تدخلين المقابلة وتاخدين راحتك مره وإنتي تعبينها وحاولي تجاوبين بمصداقيه لأن المقابلة بتكون بناءً على أسئلتك، للأمانه أنا ناسيه لكن أذكر منهم كم سؤال؛ سؤال كان مكتوب فيه صفه فيك تبين تغيرينها وهذا أكثر سؤال حيرني لأن مقدر أقول صفه شينه فيني ومقدر أقول عن صفه جيده أنها شينه وصدق مره أكثر سؤال طولت فيه 😞! بالأخير قررت أكتب لا توجد صفه أريد تغييرها 😞😞😞😞😞😞!!  
وسؤال ثاني كان عن شيء تطوعي وتكلمت عن نادي كنا مسوينه بالمدرسة وتكلمت بإختصار تعمدت قلت لعل وعسى يسألوني بالمقابلة عنها ومره أسترسل بالكلام عنه ❤️❤️ وفعلاً ضبطت الخطه 😞😞😞✅️❤️ وسؤال عن التخصصات وحطيت تخصصات كلية العلوم الطبيه التطبيقيه وأول شيء حطيته كان دكتور بصريات ❤️.

يوم دخلت سلمت وقعدت وقالولي عرفينا عليك قلت أسمى وعمري و موزنتي و ماحببت إنني بس أقول أسمى وموزونتي قلت عن نفسي إنني شخصيه هاديه وضحكو على هالكلمه كلهم الثلاث 😄😄😄 توترت شوي صراحة من ضحكتهم بس حاولت ما أبين وأبتسمت 😄 بعدين قالو من ضمن رغباتك كنتي حاطه دكتور بصريات وهو من كلية العلوم الطبيه التطبيقيه قلت إي صح منها قامو يناظرون بعض ويحاولون يشككون ما يحتاج أقول إنني برضو شوي توترت بس سويت عادي وعطيتهم هذيك الإبتسامه 😄 وبعدين قامت قالت إنني كتبتني في سؤال إن ما عندك صفه تبين تغيرينها قلت إي جدياً ما عمري قعدت مع نفسي وفكرت بهالسؤال حتى لما واجهته الآن قعدت أفكر وطولت عليه بس ماطلع معي شيء قالت وحده تسوي تحجر وبس تناظرني وساكته بس عادي ماتخوف 😄😄.

قالت لي طيب صفة تتمينها؟ سكت شوي قلت مدري ماقد فكرت قالت يعني راضيه عن نفسك إبتسمت وقلت إيه الحمد لله وضحو وضحت معهم ضحكه صغيره 🤔🤔🤔🤔، رجعت وقالت لي طيب وش رايك بالدوام المختلط؟ قلت ما عد صار هالشيء عائق لأن كل مكان صار فيه إختلاط، قامت قالت لي طيب لو كان دوامك متأخر وإنتي بنت كيف راح تتصرفين بمسؤولياتك وببيتك وعيالك؟ قلت عادي كل شيء له حل بوقته، قالت طيب عطينا حل الحين؟! قلت أودي عيالي عند أهلي أو أهله أو عنده هو نرتب وضعنا وقتها 🤔🤔 قالت لي طيب لو زوجك رفض تشتغلين بهالمجال؟ قلت لها اللي بيتقدم بيكون عنده خبر من زمان إني أدرس بهالمجال وبشتغل فيه بإذن الله ✅ قالت لي طيب كاتبه عن العمل التطوعي أحيانا عنه وعاد هنا تحمست وسولفت وسولفت مره تكلمت كثير عنه وبعفويه وبدون حتى ما أحس بنفسسي 😂😂❤️ وسألوني أحب أشتغل لحالي أو مع مجموعه قلت مع مجموعه قالو تكونين الرئيسة عليهم أو عضو قلت عضو وأخر سؤال قالتها اللي طول الوقت كانت بس تناظرني وساكتة قالت طيب دامك قلتني عن نفسك هاديه أكيد تحبين تشتغلين برواق لو مثلاً كنتي بشغل وجاك واحد تهاوش معك إنك تأخرتي وأخرتي الشغل ووو قلت بكلمه بهدوء وأفهمه إني راح أنجزه بوقته وإني لو كنت غلطانه مثلاً وفعلاً متأخره راح أعتذر منه وأكون عرضة للجزاء قالت عادي؟ قلت إي دامني غلطت أبتسمو لي وقالولي شكراً وطلعت ومره كانت مقابله لطيفه وسريعه ترا مره لا يغركم طول الكلام مرت بسرعة وفعلاً كانت أحلى تجربه بحياتي وأتمنى أعيدها 🤔❤️❤️

الله يوفقكم وييسرلكم ويبشركم بالقبول وبما تتمنون يارب 🤔❤️❤️❤️❤️.

twitter:@xi9ma

# رزان القوزي - تـمـريـض

سلام للجميع 🌿 انا رزان القوزي طالبة تـمـريـض 🩺  
حابه اقولكم تجربتي بيوم المقابله وايش الاشياء الي لازم تتفادونها وايش الاشياء  
الي المفروض تسوونها ..

في البدايه انصحكم من كل قلبي انكم تناموون بدري وتطرون وتروقون  
وتروحون قبل مقابلتكم بوقت عشان ماتتوترون ..  
واهم شي تكونون ريلاكس و تعززون ثقتم بنفسكم بس مو لحد الغرور ..  
اول شي بيوم المقابله كان من حسن حظي اني اول طالبة ادخل ع الدكاتره تبع  
المقابله طبعا كانت فيه طالبة ترشدنا قبل ماندخل وتهدينا وتعلمنا انو كل شي راح  
يمر بشكل جيد 💙💙

اول شي دخلت بابتسامه وسلمت عليهم -يعني قلت السلام عليكم مو مصافحه 🤔  
واستازنت اذا اجلس وسمحولي.بعدين اعطوني ورقه اكتب فيها اسمي وكم شي  
نسيتهم والله 🤔💔 المهم بدات تسالني انو تكلمي عن نفسك وبايش انقيلتي  
تكلت عن نفسي بعدين قلت انو الحمدلله انقيلت باول رغبه لي وهي تـمـريـض.  
طبعا هم ثلاثه الي كانوا موجودين ، وحده بس تكتب زي التقرير عني ، ووحده  
تحاول تستفزني، ووحده حليللههه

عاد الي تحاول تستفزني شوي كشرت تبي تستفزني وقالت انو انت تبغينه؟؟ قلت  
اي الحمدلله هذي اول رغبه لي وتحققت والله الحمد 🙏.

المهم سالوني وش تعرفين عن التـمـريـض وليه كانت رغبتك الاولى وايش رده فعل  
اهلك ، وهل فيه احد من اهلك داخل مجال صحي؟  
وايش الامراض المنتشره - طبعا كل وحده وحظها مع الاسئله لان في ناس سالوهم  
-اسئله عامه وشاطحه وفي ناس سالوهم اسئله بسيطه وحلوه

طبعا الدكتور المستفزه جلست تقول غريبه اهلك راضين بهالقسم ، بعدين جلست  
تقول عادي عندهم لو تاخذين شفتات بالليل؟؟؟ طيب عادي لو تشتغلين مع رجال؟؟!  
طيب لو قابلتي احد يناديك بالشغاله ايش بتسوين؟؟؟  
هي تحاول تستفزني وتبي تتأكد اذا انا جد استحق هالتخصص او لا.. بس انا  
كنت هاديه وعادي ماكأني استوعب لكلامها عشان ما اتوتر

طبعا مده المقابله ماتزيد عن ٧ دقائق. والحمدلله عدت المقابله ع خير وعلى فكره ترا  
هم متقمصين الشخصيات يعني اجباري وحده منهم تكون مستفزه ووحده حليله  
ووحده تكتب

عموما المقابله كانت من اجمل لحظه بحياتي واتمنى اعيدها صح كنت ميته خوف

وقتها بس موقف يبقي بالذاكره 🖤🖤🖤.

## حصّة - صيدلة

السلام عليكم

مبروك قبولكم بجامعة الملك سعود

بما انكم ترشحتموا للمقابلة ف ان شاء الله كلكم بنات سعود  
تجربتي

بعد ترشيحي للمقابلة بديت ابحت عن المقابلة وكيف بتكون وبعدها عرفت  
المتخصصات العام وصاروا ينصحونا الله يسعدهم ويقولون لنا تجاربهم وايش هي  
الاطياء اللي نبعد عنها

بعد ما قرئت كلام متخصصات العام واخذت فكره عن المقابلة والاسئلة وجاء اليوم  
الموعود مره كنت متوتره دخلت بالبدايه دخلونا غرفه كلها كمبيوتر بس ماطلبوا نسوي  
شي عليه

ووزعوا علينا اوراق نعبي البيانات ونجارب على الاسئلة الموجوده بها الورقه وكانت  
اسئله عن ذاتك (يعني اسئله تجاوبيهها من تفكيرك)

بعدها اللي تسلم الورقه تدخل بعد ما سلمت الورقه ودتني بنت من السنوات اللي  
اكبر الله يسعدهم كلهم كانوا يحاولون يهدونا

دخلت غرفه سلمت عليهم كانت لجنه من ثلاث دكتورات وكلهم كانوا مبتسمين  
وسالوني على اجاباتي بالورقه مثلاً

عن ترتيبتي لتخصصات ليه اخترت هذا التخصص بذات كأول رغبه

وكان في سوال مو متذكره بالضبط بس عن عوائق اللي ممكن نواجهها ونقطه من  
النقاط اللي كتبتها كانت نظرة المجتمع وسالتني عنها

وكان جوابي باحد الاسئلة كما انن عن كتاب من فتره مخلصته وراح اغلب المقابله  
عن هذا الكتاب صرت بس اتكلم عنه والحمدلله مرت بسلام وقبل ما اطلع سالتني اذا  
مممكن اعيد المقابله او لا وجلست اضحك من التوتر

وبنات ابدأ ابدأ لاتتوترون لان الموضوع مايستاهل توتر كبير حتى وقت المقابله كان  
قليل وتعدي بسرعه وحاولوا تكونون صادقين بالاجابه عشان لما تنسألون عنها  
تكونون عارفين ايش تجاوبون وما تكونون بموقف محرج

ونصيحه جيبوا معكم مويه 😊

ويا رب تتساهل اموركم على خير 💜



# شادن - طب وجراحة

السلام عليكم

أنا شادن - طب بشري 🐛🐞🌱☁️👩🏻🐛🐞

كان موعد مقابلي الاثنين اللي هو اليوم الثاني وكنت اشوف تجارب متخصصات ٤٣٧ واللي سووا مقابلة يوم الأحد اللي هي أول يوم، وطبعاً كنت خائفة مرة وقررت أنني أجاب الأسئلة اللي جتهم واضبط إجابتي عشان تكون افضل وطبعاً كنت جداً متوترة، ورحت للمقابلة وجبت المتطلبات حقتهم ولبست اللباس الرسمي اللي هو تنورة وبلوزة، أول شيء كان فيه انتظار بعدين بيودونكم لمكان تعبون الاستبانة فيه ويأخذون المتطوعات ها الاستبانة وفي أشياء ثانية انتم ما جبتوها بس عنكم معهم ويعطونها للجنة وأنتي تنتظرين برا بالكرسي تجلسين وهم اللجنة يحلون الاستبانة ويتفقون كيف يكونون معكم، فإذا ما تبون تعطونهم مجال للتجوير فخلوا اجوبتكم بالاستبانة بشكل عام وهذا اللي لاحظته من كلام البنات اللي حجروهم لأنهم فصلوا اكثر بالاستبانة فهم يدورون عنكم اشياء اللجنة، وعادي اذا حجروكم لأن بالنهاية بيشفون اذا انتي مجبورة للمجال الصحي او لا، لأنني اعرف شخصياً بنات جابوا العيد او حجروهم وعادي انقبلوا بس أقولكم اذا كنتوا ما تبونهم يحجرونكم، فكانت أسألتي عشوائية وكلها مختلفة وسألوني اذا عادي عندي الدم وأيضا لاحظت كثير يسألونهم عن التخصص اللي اخترتيه رغبة أولى عن عدد سنواته فلازم تكونين عارفة التقسيم زي الطب البشري بسعود هي ٧ سنوات: سنة تحضير، ٥ سنوات طب، وامتياز ففي بعضهم ركزوا على هالنقطة وبعضهم اختلفوا بعدد السنوات بس مهم تعرفون التقسيم ولا عادي اذا غلطتوا، وطبعاً أنا نسيت الاجابات اللي جهزتها وجاوبت كل شيء بصدق وبوجهة نظري وكان عندي شيء زين والحمدلله نسيت الاجوية اللي جهزتها ومركل شيء بسلام الا نقطة وحدة وخلوها آخر شيء لأنني كتبت بالاستبانة بجزء الاعاقات كان فيه خيار ضعف نظر او عمى، أنا عندي عين وحدة سليمة وعين ضعيفة ورحت بينت السبب عند خانا أخرى او كانت ملاحظة وبينت انها فقط عين وحدة لأن بالخيار جامع ضعف النظر مع العمى، فمسكوا علي وسألوني وطلبوا اشرح لهم كلامي واسألوني شلون بتصيرين طيبة وأنتي كذا ووضحت لهم اني اقدر اشوف زين وسألوني بعد اذا كنت لابسة عدسات وقلنتهم لا وطبعاً استغربوا هم وتحسفت اني كتبتة لأن اللي عندهم إعاقات يأخرون قبولهم، بس الحمدلله عدت وانصدمت ليه كنت متوترة لأنه ما كان يحتاج، وأهم شيء جاوبوا بثقة وتوكلوا على ربكم وتفائلوا ولا تتوترون لأن بالنهاية إن شاء الله مقبولين لأن نادراً

الرفض. وبالتوفيق 🍀

## نوف العنزي - تريض

السلام عليكم يا حلويين



معاكم نوف العنزي كلية التمريض .  
طبعاً أول شي اباركك لكم بالقبول وأنتو قدهااا ان شاء الله وكانت رغبتني

الأولى تريض والحمدلله انقبلت فيه بحكي لكم تجربتي مع المقابلة .



طبعاً أنا من ام سعودية جنسيتي سوريااا نبدأ يلاااا .

أول شي احب انصحكم فيه ان تنامون كويس ولا تتوترون والموضوع سهل  
جدا والله واعرفوا بما إنكم بجامعة سعود فأنتم شخصيات قيادية وقد نفسهااا  
طبعاً قبل المقابلة بيوم تدربت على اسئلة وكذا واستفدت الحمدلله وكانت بسيطة

يعني ونمت بدري بما اني عندي مقابلة 😎 وصحيت الصباح وكذا ما يفضلون

ان تحطين مكياج اوفرررر شي خفيف مررة بالعباية عادي طبعاً أخذت كل

شي من أوراق وغيره وأول ما دخلنا ناس تكون عند الباب وترشدكك وين

تروحي وكذا طبعاً تقدمين أوراقك وكذا

طبعاً عارفين لازم يعطونك اسئلة وتعيينهااا بمصداقية ويجي اسمك دخلنا

المقابلة 😊 احسبي انك المديرة وهم قدامك موظفين شعور ر جميل لل صدق طبعاً

بدوا بأسئلة شخصية وكذا عادية مررة طبعاً وضحت فوق ان ما كنت عايشة



هني .  
لكذا بدوا يسألون كم سنة عشتي بالحرب طبعاً كانت ثلاث سنوات وهل كنتي



تدرسين اي كنت ادرس .  
وش اصعب مرحلة مرت عليك وانتي تدرسين اصعب مرحلة كانت يوم ثالث

متوسط كانت اخر السنة فكان عندي خيارين يا تتركين السنة يا تروحي

تقدمي بمنطقة ثانية علما ان كلهم فيهم حرب فقدمت بالمنطقة الثانية كنت اطلع

تقريباً من ٣ الفجر اوصل ١١ واطلع من الاختبار ١ وأوصل البيت ٧ المغرب 😭 .

فقالوا كيف تحملتي كل هالضغط وغيره انتي بحرب ✨؟

إجابتي كانت عندي هدف اني اطلع من هالسنة بمعدل عالي ✓ والحمدلله

جبتهااا

وسألت بعد هل واجهتي صعوبات يوم جيتي السعودية بالمدرسة وكذا طبعاً

قبلهااا بالورقة انا جاوبته لكن بيون أوضحه

وآخر سوؤال بعد كيف معاملة البنات معاك بما انك اجنبية ؟

جاوبت صدقا ما حسيت اني عشت برى وجيت وكانت معاملتهم كأني وحدة

منهم وفيهم

واحبكمم واجد وإن شاء الله إنكم استفدتوااا من هالكلام والعبرة ترى المقابلة

سواليف وهرج وعندك هدف اوقفني ضد كل من يقول انتي منتي قدهااا وأخيرا

أنت لست ضعيفاً، اصعد جبلاً وخذ نفساً عميقاً و اصرخ: أنا معجزة، أنا



استثناء

# ملاك الحجي - علاج طبيعي

السلام عليكم

ياالله حيي المستجديات 🤲💖

اول شي مبروك الترشيح عقبال ما تفرحون بالقبول يارب بقولكم عن المقابلة صراحه رغم اللطعه كان يوم سريع كانه حلم وقتها جاني شعور غريب وانا انتظر دوري حسيت اني ودي اتراجع بس الحمدلله اني ما عطيت نفسي وجه 🥲💔

المهم مالكم بالطويله اول ما دخلت قالولي خذي راحتك وارتاحي لين نبدا وانا داخله ومعطيتهم وضعية الواثقه من نفسها وبدينا اساله عاد اغلبها كانت عن اجاباتي اللي ف الورقة بقولكم الاساله الخارجيه.

الاسئلة:

عرفي بنفسك؟ فيه احد يقربك داخل صحي؟ قد شاركتي بعمل تطوعي؟ وش تبغين تتخصصين؟ ليه اخترتي التخصص؟ وش اخر شي قريتيه عن تخصصك؟ كم نسبة القدرات والتحصيلي؟

-وش اسم وزير الصحه؟ قتلهم مدري بكل شفافيه 🥲🤔 قالولي كيف تبين تدخلين

صحي وانتي ما تعرفين اسمه 🥲 قلت عاد الشكوى لله 🤔 (وانا ف نفسي اقول

الحين ياملاك ودعي مستقبلك) قامت ضحكت يازينها وسلكتلي.

-تقرين كتب؟ قلت لا، قالت كيف ما تقرين شي ابد؟

قلت لا بس اقرا مقالات يعني الاشياء اللي تهمني اقراها ولا اللي ابغى اعرف عنها،

قالت وحده وش اخر مقاله قريتيها عن العلاج الطبيعي 🤔؟ قلت اخر وحده كانت ف

تويتر يشتكون انه مافيه وظائف، قالت وتبين تدخلينه ومافيه وظائف؟ قلت لا ان

شاءالله بتخرج ب معدل حلو والرزق من الله عموما قالت الرزق من الله لكن العمل

بالاسباب قلت انا عملت ودرست وابغاه يعني.

والباقي سألوني عن اجاباتي ف الورقة حاولو يشككوني ف اجاباتي ويسالوني

السؤال كذا مره ويقارنون اجوبتي ف الصدق مع اللي ف الورقه.

وبس هذي تجربتي ما كان ودي اكثر كلام البنات ماشاءالله ما قصر بس حبيت

اقولكم عشان تحفظون اسم وزير الصحه وما تسوون سواتي 🥲 وحاولو ما تكذبون

كثير عشانهم يسالون سؤال ويتعمقون فيه

والله يوفقكم يارب 💖💖💖

# ندى سعد - علاج طبيعي

بتكلم عن مقابلي وان شاء الله تستفيدون منها 😊

اول شيء المقابله جدا ممتعه ولا في شيء يخوف هو صح في توتر خفيف بس اول ما تدخلين عشان يناقشونك يروح التوتر رح يكون هناك ٣ حريم وحده تكون جديه و الثانيه تضحك و الثالثه عاديه طبعاً كل اجوبتك قولها بصدق لا تكذبون .

نصائح مهمه :

١/ لازم تكونين مركزه بالاجوبه بعض الاحيان يسالونك نفس السؤال بس بصيغه ثانيه عشان يتأكدون انك صادق.

٢/ حاولي تكون اجوبتك ما يكون فيها كلمه اختلاط عشان رح يقولون لك ان الصحي كله اختلاط و يناقشونك اكثر.

٣/ لما ينادونك عشان تناقشين دقي الباب و سلمي اول ما تدخلين و استأذني قبل ما تجلسين ولا تجلسين رجل على رجل ولا تشبكين اصابعك ببعض ( هذي سويتها و اللي نصحني فيها فهد الباطين)

٤/ حاولي انك تناظرين الكل مو بس على اللي تسالك ولما تجاوبين ناظري الشخص اللي سالك اول شيء ثم ناظري الباقي ( اختصار وزعي النظر على الكل )

٥/ خليك بشوشه مبتسمه طول الوقت

بعض الاسئله اللي سالوني اياها:

١/ ليش دخلتي سعود ؟

٢/ تقدرين تسيطرين على حياتك الزوجيه و العمل ؟

٣/ اوش حابه تتخصصين ؟

٤/ انتي دخلتي صحي برغبتك ولا احد قال لك ؟

٥/ لو جاك مريض حالته حرجه و ولي الامر رافض تعالجينه بتعالجينه ولا بتتركينه يموت ؟

٦/ في احد من اهلك داخل مسار صحي ؟

٧/ من متى وانتي تحبين الاشياء الصحيه ؟

اخر Nada\_swi



## ريما المطيري - صيدلة

السلام عليكم ورحمة الله وبركاته ، انا ريما المطيري 🌸وانتهيت من السنة الأولى المشتركة وراح احكي لكم تجربتي في المقابلة الشخصية.  
اول شيء بقول لكم نصيحة : ابدأ ماله داعي التوتر المقابلة راح تكون خفيفة وجميلة ونادرا ما يتم الرفض.

اول ما طلع لي وقت الترشيح ماكنت متوترة ابد وكنت واثقة وما دخلت قروبات او شيء ولا تدريب على اسئلة وبعدين يوم درت اختي مسكتني وقعدت تطرح علي اسئلة ايش هي مواهبك ، عرفني بنفسك ، ايجابياتك وسلبياتك ، ودخلت قروب بالواتس كان فيه طالبات اكبر مننا وارسلوا لنا فايل مجهز منهم كان معلومات كثيرة مره افادتني، تقريبا كل هذا سويته قبل المقابلة بيوم لان اختي درت عني اني ما سويت شيء 😂😂، وفي يوم المقابلة حرصت اني انام كويس وجهزت الاغراض اللي كانوا طالبينها مننا (راح تكون موجودة على البوابة) من قبل وشيكت عليها واخذتها معي ، وانا في الطريق حاولت اقرا عن تاريخ الجامعة شوي واسامي المسؤولين وعن الصحة حاليا (من منشئة الى مسؤول) بشكل عام 🙌 ، اول ما دخلت طبعا كنت متأخرة كالعادة وخفت ان وقتي راح علي بس الحمد لله دخلوني طبعا بعد ما يوقعونكم بيدخلونكم في قاعة كبيرة علشان تعبون بياناتكم والورقة كانت :

"معلومات ما تذكرها مرة فراح اذكر لكم اللي يخطر في بالي"  
معلوماتك الشخصية، انجازاتك ، اعمالك التطوعية ، ترتيب الكليات (طب ، طب أسنان، الصيدلة، كلية العلوم الطبية التطبيقية) وحاولت افكر بكم سؤال على ترتيب عشان اكون مستعدة .

بعد كذا جوا المتطوعات ونادوني وجيت ادخل شلت عباتي وسميت ويوم حسيت اني مستعدة دخلت وسلمت (ماصافحتهم حسيت السلام اللفظي افضل) وقعدت، كثير كانوا يقولون انتبهوا للجلاسة ولا تحطون رجل على رجل بس نسيت واول ما قعدت حطيت رجل على رجل 😂😂، عرفت بنفسني انا طالبة تخرجت بمعدل كذا من الثانوية ودرجاتي في القدرات والتحصيلي ، وما اذكر اول شيء قالوه لي بس بقول ايش الأشياء اللي انطرحت علي :

• قد شاركتي بأشياء تطوعية وايش هي ؟

- ايه الحمد لله بس نطاق تطوعاتي كات في حدود المدرسة من الاذاعة الى الانشطة والمشاريع.

مدري ليش جبت طاري المصلى والمشاريع بس حسيتني جبت العيد فما تقلسفلت

\* ايش رايك بنظرة المجتمع للمرأة العاملة في المجالات الصحية ؟  
- قلت الحمد لله حاليا المجتمع تغير وكل شيء تغير ، لما تشوفين مثلا في مواقع التواصل الاجتماعي عن انجاز عاملة اي كان تخصصها في المجال الصحي وتشوفين التعليقات من ثناء او مديح وشكر هذا يدل على تغير نظرة المجتمع وتطورهم وكيف الشيء هذا يدل على الفخر من حيث كيف كانوا والى اين وصلوا وهذا ما ينكر وجود بعض الحالات اللي مازالت رجعية بعض الشيء بس ما ننكر ان الغالبية والأكثرية ايجابيين 🥰💕.

من انجازاتي كنت كاتبة اني حفظت القران كاملا، فغالبية الحديث كانت عنه.  
\* كيف راح تحافظين على حفظك اثناء لدراستك ؟  
- قلت انا حاطة لي خطة اني ما اهمل حفظي وراح ادخل نوادي ، علشان صحيح صعب لو كنت لوحدي احاول اراجعه واحاول اوفقه بينه وبين الدراسة بس مافيه شيء صعب لو كان التنظيم موجود، وعلى العكس اللي مريحني كثير قالوا اول ما دخلوا نوادي تحفيظ تبارك وقتهم، اصلا ينظم الوقت لو كنتي عارفة انك راح تروحين الوقت الفلاني انا بذاكر ايضا الوقت الفلاني راح انام في الوقت كذا علشان اصحى كذا فعلى العكس متحمسة علشان اشوف النتائج 🙌❤️ .  
\* لو ما انقبلي بالتخصص اللي تبينه ايش راح تسوين؟  
- اول شيء بحاول بكل الطرق الممكنة صحيح خيرة بس ما اقول كذا واحط رجل على رجل استنى كل شيء يجيني، راح احاول احول بعد ترم ، سنة احاول بكل الامكانيات بعد ذلك(ماقلت اني بغير الجامعة) اذا جد صحيح كان كل شيء مقفل راح ارضى بقضاء الله وقدره في الاول والاخير رزقي مكتوب لي قبل ما انولد وربّي اعلم 🙌🙌.

وهذا بس اللي اذكرة وشكروني وطلعت ورحت استانست باجازتي وهذا اللي عليكم تسوونه سواء خايفين انكم جببوا العيد او واثقين بنفسكم خلاص استمتعوا بالاجازة علشان بكرة تستمعون انكم طلاب في جامعة الملك سعود 💕

في حال اردتم التواصل معي:

Twitter: @ReemaMammdoh

# رَهف العوبثاني - علاج علل النطق والسمع

اهلاً وسهلاً مبروك القبول مقدماً معاكم رَهف العوبثاني ✨ من دفعة 438

مسار صحي تخصصي علاج علل النطق والسمع 🏥.

المقابلة كانت شي بسيط جداً يعني فيه ناس كانوا ماخذين الموضوع بمحمل الجد وانه اختبار مصيري ومتوترين ويشوفون اسئلة المقابلات السابقة ابداً الموضوع مو كبير لهاذي الدرجة أول شي المقابلة عبارة عن ثلاثة اشخاص جالسين قدامكم بكل كلاس تدخلونه بيكون لهم نفس الشخصية يعني حرفياً يتعمدون ههالشني ؛ لأن في وحدة منهم كنت مقابلتها وكانت تضحك برا الكلاس لكن يوم دخلت الكلاس انقلبت شخص ثاني ونظراتها تغيرت مره عشان تعرفون ان كل ذا عبارة ع تمثيل وهدفهم "الاساسي تقريباً ومو الكل طبعاً انهم " يرفعون الضغط بحكيلكم عن كل شخص..

الشخص الاول 🤖

هذا بيكون بارد جدا تحسون لو بيسأل بس سؤال سؤالين والاسئلة سهلة مرة

الشخص الثاني 🔥.

هذا هو اللي مسوي فيها انا القافط اللي احشرك بالاسئلة يعني شخص مستقعد حرفياً

الشخص الثالث 🤖

هذا بيكون وسط بينهم يعني مو مرة استقعد ولا بارد

قبل لا ابداً احكي فيه اشياء لازم تعرفونها مهمة:

1- الاحترام اساس كل شي 🧑


2- لا تكونين جداً صادقين بالمقابلة 😞

3- لا تذكرن نقاط ضعفكم 😞


4- لا تجاوبون حاجة الا وانتم عارفي ايش سبب اختياركم لهاالجواب 🤔






## الاحترام اساس كل شي:

تعرفون ان الاشخاص اللي قدامكم كلهم دكاترة لازم تحترمونها يعني رديكم لازم يكون بهدوء واحترام لان الاحترام اساس كل شيء يعني مو قوة شخصية ولا شي كويس ابدأ انكم ترفعون اصواتكم او تقولون ادبكم بالرد لان هالشئ يعكس سلبي على شخصيتكم وبالنهاية انتو اللي بتاكلونها حتى لو هم كلامهم كان مستفز ابدأ لاتفكرون تغلطون عليهم مشوا الموضوع بهدوء 

## لا تكونين جداً صادقين بالمقابلة:

في فئات كثيرة يدخلون الصحي وتوهم ما فكروا بالتخصص المناسب فهنا لا تقولون لهم انا دخلت صحي ولا فكرت وش بتخصص لان بتكثر الاسئلة اللي كذا فحتى لو ما فكرتوا بالتخصص قولوا اي تخصص مو لازم تكونون صادقين بانكم فعلا تبون هالتخصص هي مجرد اسئلة مافيه ملفات او اشياء تثبت انه قلتوا كذا يعني عادي عشان تبعدون عن اسئلتهم او بالاخص انه انت انسان بلا هدف ومن هالكلام 

## لا تذكرين نقاط ضعفكم:

وش اقصد بكلامي هذا بعطيكم مثال انا بمقابلي كانوا كاتبين بالورقة سؤال : انه وش الشئ السلبي فيني وابغى اغيره طبعاً انا كنت اجوب كل سؤال بدمه وضمير كتبت اني (اعصب بسرعة)    طبعاً قاموا بالمقابلة استغلوا هالنقطة بشكل ما تتخيلونه يعني كانت تقريباً المقابلة عن هالشئ وحاولوا ينرفزونني طبعاً ليش؟ لاني انا اعطيتهم مجال يتسألون كيف يعني حاولوا ينرفزونني ??? كانوا يقولون لي بما انك تعصبين بسرعة كيف بتتعاملين مع المرضى وقالوا لي اجل انتي ما تستحقين انك تدخلين صحي بكذا ينفع لك انك تدخلين اداري وقالوا لي تدرين وش اكثر مشكلة تسبب الطلاق جاوبت جاو قالوا لاالسبب ان الوحدة تعصب بسرعة وماتتفهم زوجها يعني حرفياً دخلت وكانوا يحطمون فيني تحطيم لكن كل هذا كان عبارة عن اختبار خليك هادئين ولا يأترون فيكم

انا اجتزت اسألتهم بكل برود وصدمتهم انه انا عشان اني اخترت الصحي اقدر اغير

كل شيء سلبي فيني المهم اني اجتزت العيد اللي جيته لنفسى 😊

وتراهم يحطمون وهم متعمدين مو معاناه انه انا ما استحق لأ مجرد مايشوفون ردة فعلي هل انا فعلاً بأعصب عليهم بسرعة زي ماكتبت ، لكن ما اعطيتهم اللي بيغونه

خليكم ازكياء 💡

واكتبوا كل شيء ايجابي على اساس انه شيء سلبي بعطيكم مثال ، ، مثلا تكتبون (( انا انسان اهتم ودقيق بزيادة وهالشيء يضيع وقتي )) طبعاً هم بيشفونخ شيء حلو؛ لأنه انت دقيقه ومتهمه وهالشيء حلو وبما ان الوقت يمر بفايدة مايسمى ضياع وقت وترا ابدأ مو غريب وطبيعي جداً لو جو ينتفون فيكم لأن هذا هو المطلوب انه يستفزونكم لكن ابدأ ابدأ لاتعطونهم هالشيء ، مب الكل راح يسوون كذا هو يعتمد عليكم شخصياً ف لا تعطونهم فرصة يتعاملون معكم بالاسلوب هذا 😎.

## لا تجاوبون حاجة الا وانتم عارفي ايش سبب اختياركم لهالجواب:

قبل ماتجاوبون أي جواب لازم تسألون نفسكم ليش جاوبتوا هالاجابه بالذات ليش؟! ؛ لأنه غالباً بعد كل سؤال يقولون لكم وش السبب ولازم السبب يكون منطقي وبنفس الوقت بدون ماتتفلسفون عشان مايستقدون لكم ، بعطيكم مثال ..  
مثلاً لو جو قالوا لكم وش ترتيب رغباتكم ومثلاً كان طب بشري طبعاً بيجون يقولون لكم ( ليش اخترتي طب )

وطبيعي طبيعي يعني اغلب الناس بيكون ردهم ( عشان احب اساعد الناس .... )  
ومن الحين احذفوا هذا السبب نهائياً من راسكم لأن التخصصات الصحيه كلها فيها مساعدة ف ما هو جواب منطقي وبيستقدون لكم عليه . 🤔

\*وبس هذي نهاية المقابلة الشخصية\*

ملاحظة بسيطة :

تدربوا كيف تعرفون نفسكم طبعاً بعيداً عن الاسم والعمر وغيرها لان اغلب شيء اول

سؤال يكون ( عرّف عن نفسك ) 🤔🤔

وبكذا تكونون ملّمين على كل حاجة تخص المقابلة

وخطوا في بالكم دائما:

ما ترشحتوا وانقبلتوا بجامعة الملك سعود في هذا

المسار الا وانتم أهل لهذا المكان وأولى فيه ❤️.

وفي حال احتجتوا اسئلة احنا هنا لخدمتكم 😊

**ASK:@KSU439**

لمياء الماضي - علاج علل النطق والسمع

**twitter:ilamyaa1**